

Vijeće sigurnosti UN-a raspravljalо o Bosni i Hercegovini

Vijeće sigurnosti UN-a u utorak je jednoglasno usvojilo rezoluciju o Bosni i Hercegovini u kojoj je pozdravilo odluku Evropske unije da od 1. januara 2003.god. preuzme dužnosti UN-a vezane za obuku i nadzor policije. Vijeće je također jednoglasno iskazalo svoju zahvalnost i podršku za sve što je uradio Visoki predstavnik, Wolfgang Petritsch, tokom gotovo tri godine na svojoj dužnosti u BiH. Visoki predstavnik je u utorak obavijestio Vijeće sigurnosti o svojoj namjeri da sa ove dužnosti ode krajem mjeseca maja. Vijeće je odobrilo odluku Vijeća za implementaciju mira da imenuje Paddy Ashdowna za novog Visokog predstavnika.

Generalni sekretar UN-a, Kofi Annan, odao je priznanje Visokom predstavniku, konstatirajući da je njegovo "efikasno vodstvo pomoglo da se učvrsti napredak koji je postigla Međunarodna zajednica" u BiH tokom posljednjih godina.

Članovi Vijeća sigurnosti su pohvalili rad Visokog predstavnika te jasno iskazali da će i dalje imati njihovu punu podršku tokom ostatka njegovog mandata. Izrazili su zadovoljstvo mjerama koje se trenutno poduzimaju kako bi se reorganizirale operacije Međunarodne zajednice u BiH te su apelirali na političke vođe u BiH da postignu kompromis u vezi sa provedbom Odluke ustavnog suda o konstitutivnosti naroda.

Visoki predstavnik Evropske unije za vanjsku i sigurnosnu politiku, Javier Solana, rekao je da je za napredak ostvaren u BiH "zaslužan, i to u velikoj mjeri" njegov prijatelj, Wolfgang Petritsch. Gospodin Solana je naveo usvajanje važnih

zakona na državnom nivou, povećanje broja tzv. manjinskih povrataka te kontinuirano jačanje institucija BiH, koje su, rekao je Solana, pokazale da je moguće postići stvarni napredak uz političku volju. Međutim, gospodin Solana je kritikovao spori tempo kojim političari BiH usvajaju uslove iz Smjernica EU (EU Road Map), te je upozorio da ukoliko se BiH ne angažira na reformama i evropeizaciji "prestići će je ambiciozniji i dalekovidniji susjedi."

Specijalni predstavnik generalnog sekretara UN-a, Jacques Paul Klein, koji je takođe sudjelovao na sjednici Vijeća sigurnosti, podržao je apel visokog predstavnika u vezi sa dalnjim provođenjem sudske reforme.

Velika Britanija je uputila iskrene čestitke gospodinu Petritschu na njegovoj predanosti, konstatirajući da je pokazao odlučnost u krajnje teškim vremenima te da će biti "teška dužnost nastaviti" rad koji je on obavljao tokom svog mandata.

Sjedinjene Američke Države su čestitale Visokom predstavniku na "izuzetnoj posvećenosti radu" te su iznijele konstataciju da je rezultat njegovog rada činjenica da je BiH sada znatno stabilnija zemlja.

Sjedinjene Američke Države su zahtijevale da vođe u BiH postignu veći napredak u vezi sa "teškim odlukama", kao što je postizanje sporazuma o provedbi odluke Ustavnog suda, obavljanje priprema za oktobarske izbore, usvajanje budžeta Države i Federacije, te provođenje sveobuhvatne pravosudne reforme. Sjedinjene Američke Države su također pružile čvrstu podršku oštrog akciji SFOR-a u pogledu hapšenja optuženih ratnih zločinaca i pozvale su Republiku Srpsku da u potpunosti sarađuju sa Krivičnim tribunalom.

Rusija je podvukla da potencijal Dayton ni blizu nije iscrpljen, dodavši da sad postoji čvrsta osnova za državnost BiH. Rusija je apelirala na vođstvo BiH da pronađe kompromisno rješenje za implementaciju odluke Ustavnog suda, pozivajući političke predstavnike oba entiteta da se "izdignu iznad uskih etničkih interesa".

Hrvatska je konstatirala da se visoki predstavnik u toku svoga mandata nalazio u "praktično nemogućim" političkim situacijama ali je ipak prevladao. I Hrvatska je također uputila apel vođstvu BiH da nađe pravedno rješenje u tekućim ustavnim razgovorima.

SRJ je podcrtala zadovoljavajući razvoj međudržavnih odnosa između SRJ i BiH i pozdravila je inicijativu OSCE-a o povratku izbjeglica, u okviru koordinacije napora koji se ulažu na povratku u SRJ, Hrvatsku i BiH.

BiH je izrazila zahvalnost visokom predstavniku za njegov angažman i vođstvo, pozdravila EUPM i izrazila podršku za sudsku reformu.

U ponedjeljak su visoki predstavnik i generalni sekretar Kofi Anan održali bileteralni sastanak na kojme su vodili diskusiju o statusu ustavnih pregovora i o aranžmanima koje treba uspostaviti kako bi se osigurao uredan prenos ovlasti sa IPTF-a na EUPM. Visoki predstavnik je ponovio svoj stav da je hapšenje i transfer u Hag svih optuženih ratnih zločinaca, uključujući Radovana Karadžića i Ratka Mladića, od suštinskog značaja za stabilnost i progres u Bosni i Hercegovini. Dodao je da suđenje Slobodanu Miloševiću demonstrira potrebu utvrđivanja individualne odgovornosti, putem adekvatnog djelovanja zakona, tako da se za zločine koje je počinila mala manjina ne može smatrati odgovornim cijeli narod. Visoki predstavnik je također informirao generalnog sekretara o

reformi pravosuđa, te o naporima koji se poduzimaju na reduciranju entitetskih oružanih snaga.

U utorak, prije sjednice Vijeća sigurnosti, visoki predstavnik se sastao sa gosp. Janom Petersenom, ministrom vanjskih poslova Norveške, koji je predsjedavao sjednicom. Gosp. Petersen je naglasio hitnost nalaženja lokalnog rješenja za ustavne pregovore. On je također rekao da je zabrinut zbog političke situacije u RS i nezadovoljavajućeg nivoa saradnje RS sa Krivičnim tribunalom (ICTY). Visoki predstavnik je pozdravio doprinos Norveške procesu implementacije Daytonskog sporazuma i njeno moguće učešće u EUPM, kao i njen angažman na programu reforme pravosuđa.

U bilateralnim razgovorima održanim u utorak, visoki predstavnik i Javier Solana iz EU razgovarali su o aranžmanima za EUPM i cjelokupnom angažmanu EU u BiH, što, prema riječima gosp. Petritscha, potpuno odgovara naporima BiH na provođenju evropske strategije. Gosp. Petritsch je rekao kako se nada da će gosp. Solana biti u mogućnosti posjetiti Sarajevo u toku narednih sedmica.